

ՀՀ ԿԱ պետական եկամուտների կոմիտե

Հարկային և մաքսային մարմինների գանգատարկման հանձնաժողով

Ո Ր Ո Շ ՈՒ Մ 13/4

14 մարտի 2017թ.

Քննարկվեց «Մեծ բուրգ» ՍՊԸ գանգատը ՀՀ ԿԱ ՊԵԿ Մաշտոցի ՀՏ 17.02.2017թ. թիվ 2134132 ակտի դեմ:

«Մեծ Բուրգ» ՍՊԸ գանգատում բերված փաստարկները.

Հանրային սննդի ոլորտում գործունեություն իրականացնելու համար «Մեծ բուրգ» ՍՊԸ-ի կողմից արտոնագրային վճարներն իրականացվում են ամսական պարբերականությամբ, ամսական հաշվարկով և ըստ այդմ ներկայացվում է ամսական կտրվածքով գործունեություն իրականացնելու համար (79 քառ. մետրի համար 194,000 ՀՀ դրամ) արտոնագրային վճար վճարող համարվելու մասին հայտարարություններ: Ընկերության կողմից 31.01.2017թ. սահմանված ժամկետում վճարվել է նաև 2017թ. փետրվար ամսվա համար հաշվարկված 194,000 ՀՀ դրամ արտոնագրային վճարը, որի վերաբերյալ հայտարարությունն ընկերության հաշվապահի անձնական դրդապատճառներով քաղաքից բացակայության և տնօրենի վատառողջ լինելու հետևանքով (անաշխատունակության թերթիկը) նույն օրը չի ներկայացվել:

2017թ. փետրվար ամսվա ընթացքում հանրային սննդի ոլորտում գործունեություն իրականացնելու նպատակով արտոնագրային վճար վճարող համարվելու մասին հայտարարությունը 04.02.2017թ. պատվիրված փոստի միջոցով ներկայացվել է Մաշտոցի ՀՏ: Ընդ որում, արտոնագրի ուշացված օրերի ընթացքում կատարված գործարքների արժեքը ֆիքսվել են կազմակերպությունում գրանցված նոր սերնդի հսկիչ-դրամարկղային մեքենայի միջոցով, որը ևս մեկ անգամ ապացուցում է այն փաստը, որ սահմանված ժամկետում 2017թ. փետրվար ամսվա համար հաշվարկված արտոնագրային վճարը կատարելուց հետո արտոնագրի հայտարարություն չներկայացնելը միտումնավոր չի կատարվել և նպատակ չի հետապնդվել իրականացնելու գործունեություն՝ առանց արտոնագրի:

Հետագայում, ՀՀ ԿԱ ՊԵԿ-ի Մաշտոցի ՀՏ պետի 10.02.2017թ. թիվ 2134132 հանձնարարագրի հիման վրա Մաշտոցի ՀՏ-ի կողմից 14.02.2017թ. կազմված թիվ 2134132 ակտի նախագծով սահմանվել է տուգանք՝ 1,159,200 դրամի չափով, որի վերաբերյալ 15.02.2017թ. ներկայացվել է առարկություն: Սակայն ՀՀ ԿԱ ՊԵԿ Մաշտոցի ՀՏ կողմից 17.02.2017թ. կազմվել է թիվ 2134132 ակտը՝ սահմանելով 1,159,200 դրամի չափով տուգանք:

Հաշվի առնելով, որ.

- հանրային սննդի ոլորտում գործունեություն իրականացնելու համար «Մեծ բուրգ» ՍՊԸ-ի կողմից արտոնագրային վճարները իրականացվել են ամսական պարբերականությամբ, ամսական հաշվարկով և արտոնագրային վճար վճարող համարվելու մասին հայտարարություններն ընկերության կողմից գործունեության ընթացքում միշտ ներկայացվել են ամսական կտրվածքով,

- 31.01.2017թ. սահմանված ժամկետում վճարվել է նաև 2017թ. փետրվար ամսվա համար հաշվարկված 194,000 ՀՀ դրամ արտոնագրային վճարը,

- երբևէ արտոնագրային վճարի և ըստ այդմ հանրային սննդի ոլորտում գործունեություն իրականացնելու համար արտոնագրային վճար վճարող համարվելու մասին հայտարարությունների ուշացումներ «Մեծ բուրգ» ՍՊԸ-ի կողմից չեն եղել,

- նախատեսված հայտարարությունն ընդամենը 3 օրվա ուշացումով 04.02.2017թ. պատվիրված փոստի միջոցով ներկայացվել է ՀՀ ԿԱ ՊԵԿ Մաշտոցի ՀՏ,

- արտոնագրի ուշացված օրերի ընթացքում կատարված գործարքների արժեքը ֆիքսվել են կազմակերպությունում գրանցված նոր սերնդի հսկիչ-դրամարկղային մեքենայի միջոցով, արտոնագրի հայտարարություն չներկայացնելը միտումնավոր չի կատարվել և ըստ էության նպատակ չի հետապնդվել իրականացնելու գործունեություն՝ առանց արտոնագրի, ուստի գանգատաբերը կարծում է, որ.

«Մեծ բուրգ» ՍՊԸ-ի վրա դրված պարտականությունները բովանդակային առումով կատարված են և արտոնագրի հայտարարություն ներկայացնելը կրում է զուտ ձևական բնույթ և հետևաբար «Վարչարարության հիմունքների և վարչական վարույթի մասին» ՀՀ օրենքի 5-րդ հոդվածի պահանջները հաշվի առնելով գանգատաբերն առարկում է ՀՀ ԿԱ ՊԵԿ Մաշտոցի ՀՏ 17.02.2017թ. թիվ 2134132 ակտի հիման վրա սահմանված 1,159,200 ՀՀ դրամի չափով տուգանքի կիրառմամբ պարտականություններով ծանրաբեռնելու պահանջը:

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովի եզրակացությունը.

ՀՀ ԿԱ ՊԵԿ հարկային և մաքսային մարմինների գանգատարկման հանձնաժողովը (այսուհետ նաև՝ Հանձնաժողով), ուսումնասիրելով սույն գործին առնչվող նյութերն ու ապացույցները եկավ հետևյալ եզրակացության.

Քննարկման ընթացքում նշվեց, որ ՀՀ ԿԱ ՊԵԿ Մաշտոցի ՀՏ պետի 10.02.2017թ. թիվ 2134132 հանձնարարագրի համաձայն «Մեծ բուրգ» ՍՊԸ-ում (այսուհետ նաև՝ ընկերություն) կատարվել է օրենքով սահմանված ելակետային տվյալների և գործակիցների ճշտության ստուգում: Արդյունքում կազմվել է ՀՀ ԿԱ ՊԵԿ Մաշտոցի ՀՏ 17.02.2017թ. թիվ 2134132 ակտը (այսուհետ նաև՝ Ակտ), որով լրացուցիչ վճարման է առաջադրվել 1.159.200 դրամ:

Ակտի 1-ին կետով մասնավորապես արձանագրվել է, որ «Մեծ բուրգ» ՍՊԸ-ն ք.Երևան, Զանիբեկյան 1 հասցեում 2017թ. փետրվար ամսին իրականացնում է հանրային սննդի ոլորտի գործունեություն 79 քմ սպասարկման սրահի միջոցով (հիմք՝ Z հաշվետվություն), որի ամսեկան արտոնագրային վճարի չափը կազմում է 193.200 դրամ, սակայն տվյալ ամսվա համար հարկային տեսչություն չի ներկայացրել արտոնագրային վճար վճարող համարվելու վերաբերյալ հայտարարություն, չի ստացել արտոնագիր՝ խախտելով «Արտոնագրային վճարների մասին» ՀՀ օրենքի 8-րդ հավելվածի 5-րդ կետի պահանջները, որի համաձայն արտոնագրային վճար վճարողները մինչև գործունեություն իրականացնելը, իսկ գործունեության տվյալ տեսակի համար համապատասխան արտոնագիր ունեցող անձինք մինչև նախկին արտոնագրով նախատեսված ժամանակահատվածից հետո գործունեության տվյալ տեսակը շարունակելը, որևէ ժամանակահատվածի համար իրենց հաշվառման հարկային մարմին են ներկայացնում սույն հավելվածի թիվ 1 ձևով սահմանված հայտարարություն: Արդյունքում հիմք ընդունելով «Արտոնագրային վճարների մասին» ՀՀ օրենքի 9-րդ հոդվածի 7-րդ կետի դրույթներն արտոնագրային վճարի գծով լրացուցիչ վճարման է առաջադրվել ընդամենը 1.159.200 դրամ:

Քննարկման ընթացքում պարզվեց, որ «Մեծ բուրգ» ՍՊԸ-ն գործունեություն է իրականացնում հանրային սննդի ոլորտում և մշտապես սահմանված կարգով և ժամկետներում ներկայացրել է արտոնագրային վճար վճարող համարվելու մասին հայտարարությունները և վճարել արտոնագրային վճարների գումարները:

Տվյալ դեպքում ընկերության կողմից սահմանված ժամկետում՝ 31.01.2017թ., վճարվել է 2017թ. փետրվար ամսվա արտոնագրային վճարը՝ գումարով 194.000 դրամ (գործում առկա է նշված փաստը հիմնավորող ապացույցը): Ինչ վերաբերվում է 2017թ. փետրված ամսվա արտոնագրային վճար վճարող համարվելու վերաբերյալ հայտարարությունը սահմանված ժամկետում չներկայացնելուն, ապա դա պայմանավորված է եղել նրանով, որ ընկերության տնօրենը եղել է վատառողջ (գործում առկա է անաշխատունակության թերթիկը), իսկ հաշվապահը՝ բացակայել է քաղաքից:

Սույն գործի վերաբերյալ որոշում կայացնելիս Հանձնաժողովը գտնում է, որ անհրաժեշտ է հաշվի առնել հետևյալ փաստական հանգամանքները, մասնավորապես՝ ընկերության կողմից սահմանված ժամկետում վճարվել է 2017թ. փետրվար ամսվա արտոնագրային վճարի գումարը, ինչպես նաև այն, որ ընկերությունն ինքնուրույն՝ մինչև հարկային մարմնի կողմից փաստի արձանագրումը, սահմանված կարգով ներկայացրել է 2017թ. փետրված ամսվա արտոնագրային վճար վճարող համարվելու վերաբերյալ հայտարարությունը:

Ելնելով վերոգրյալից՝ Հանձնաժողովը գտնում է, որ ընկերության գանգատը ենթակա է բավարարման:

Ելնելով քննարկման արդյունքներից և ղեկավարվելով «Հարկային ծառայության մասին» ՀՀ օրենքի 43.1-րդ հոդվածի, «Մաքսային ծառայության մասին» ՀՀ օրենքի 37-րդ հոդվածի պահանջներով Հանձնաժողովը

ո Ր Ո Շ Ո Ւ Մ Է՝

Անվավեր ճանաչել ՀՀ ԿԱ ՊԵԿ Մաշտոցի ՀՏ 17.02.2017թ. թիվ 2134132 ակտը:

Հանձնաժողովի նախագահ՝



Վ.ՄԻՐՈՒՄՅԱՆ